

Rapport dalla seduta dil cussegl da vischnaunca dils 8 d'avrel 2020 a Breil.

Beinvegni ed avertura

Il vice-president dil cussegl, Tarcisi Dietrich fa a tuts presents in cordial beinvegni alla seduta da questa sera. Quella seduta vegn tenida giu sut cundiziuns spezialas en connex cun il virus da corona. Ei vegn giavischau da tut ils presents da setener vid las mesiras da hygiena e da tener distanza in da l'auter.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Cunquei ch'ei vegn buca fatg diever da tala ei la gliesta per la seduta da questa sera ligionta.

1. Approbaziun dil protocol dalla seduta dil cussegl dils 19 da november 2019

Il protocol ei vegnius tarmess allas cusseglieras ed a tuts cussegliers. Il vice-president dil cussegl suttametta el alla discussiun. Da tala vegn buca fatg diever. Il protocol vegn approbaus unanim.

2. Approbaziun lescha dallas alps e pastiras da casa

La lescha dallas alps e pastiras da casa cuntegn determinaziuns per las alps sin il territori communal che completeschan la legislaziun federala e cantunala :
Quella lescha ha la suprastonza ellavurau ora en pliras sedutas ensemen cun signur Gujan dil Plantahof. Las cumissiuns d'alp dils vischinadis ein vegni orientai sur dalla nova lescha. Els han ussa l'incumbensa d'ellavurar ora las statutas per las societads d'alp, las qualas ston corrispunder alla lescha.

Clau presenta al cussegl la lescha e repassa ils differents artechels. La suprastonza propona al cussegl d'approbar quella lescha e da metter quella naven digl 1 d'october 2020 en vigur.

Duront la deliberaziun dalla fatschenta en detagl, vegn il suandont artechel adattaus:

Art. 6 al. 2 secloma da niev.

Dumbrar en e reparter ils animals sin las alps. Orientar il gerau d'agricultura sur dalla repartiziun tochen igl 1 da mars.

La discussiun vegn dada libra. Sin las damondas sa vegnir dau risposta. Cun tscharna unanima approbescha il cussegl la lescha dallas alps e pastiras da casa cun la midada egl art. 6. La lescha va en vigur naven digl 1 d'october 2020.

3. Annullar reglements forestals da Breil e Vuorz

Las anteriuras vischnauncas da Breil e Vuorz possedevan in reglement resp. in uorden forestal. El temps dad oz ei il menaschi d'uaul per gronda part reglaus en la lescha cantunala. Ord quei motiv ha la suprastonza desistiu dad ina nova lescha, ed enstagl ellavurau ora ensemen cun igl uffeci forestal ina ordnaziun forestala per la vischnaunca da Breil. En quella ordinaziun vegn reglau specificamein l'organisaziun e las incumbensas per nossa vischnaunca. L'ordinaziun forestala stat en cumpetenza dalla suprastonza. Aschia vegn l'ordinaziun mo prida per enconuschientscha dil cussegl.

La suprastonza fa la proposta d'annullar il reglement forestal da Breil digl onn 1998 sco era igl uorden forestal da Vuorz dil 2009 e da remplazzar quels cun l'ordinaziun forestala

che va en vigur naven digl 1 da schaner 2020. Quell'ordinaziun vegn aunc approvada digl uffeci forestal cantunal.

La discussiun vegn dada libra. Sin las damonda sa vegnir dau risposta. Cun tscharna unanima decida il cussegl d'annullar ils reglements forestals Breil e Vuorz e da remplazzar quels cun ina ordinaziun forestala.

4. Approbaziun plan general d'avertura

Ils 24. risp. 25 da zercladur 2017 han las treis vischnauncas d'Andiast, Breil e Waltensburg/Vuorz approvau il contract da fusiun cun gronda maioritad. En quei contract ei stipulau il suandont:

Denter ils vischinadis da Waltensburg/Vuorz e Breil/Brigels vegn realisau ina via communal. Per tal intent vegn en rama d'ina meglieraziun generala approvau in credit ell'altezia da brutto 5.1 milliuns francs. La via ei definida sco via da colligiaziun communal denter ils vischinadis ed ei da construir aschia, ch'ella promova buca il traffic da transit. Ei vegn relaschau in scamond da carrar per autos da vitgira ed autocars. La suprastonza dalla vischnaunca nova ei obligada dad introducir ulteriuras mesiras che reduceschan il traffic sche quel crescha considerablamein.

Il contract da fusiun ei ligionts per la vischnaunca da Breil/Brigels. Quei vul di che la suprastonza ei obligada d'instradar las mesiras necessarias.

Suenter in pli liung temps da planisaziun ed integraziun dils uffecis cantunals, ha giu liug naven dils 19 da settember 2019 la publicaziun dil project. Sin fundament da quella publicaziun ha ei dau pliras protestas da privats ed era organisaziuns. Sin fundament da quellas protestas ha la suprastonza decidu da sistir per il mument il project e da far sco emprem pass la revisiun parziala dil plan general d'avertura.

Naven dils 9 da schaner 2020 entochen ils 7 da fevrer 2020 ha giu liug l'exposiziun da cooperaziun dil plan general d'avertura. Sin quella publicaziun ha ei era dau differentas posiziuns, sin las qualas la suprastonza priu posiziun ensemen cun la planisadra ed in jurist.

La suprastonza fa la proposta d'approbar il plan general d'avertura per mauns dalla votaziun all'urna.

La discussiun vegn dada libra. Sin las damonda sa vegnir dau risposta. Cun tscharna unanima decida il cussegl d'approbar il plan general d'avertura per mauns dalla votaziun all'urna.

5. Varia

Clau Schlosser informescha il cussegl sur dalla lavur dil stab da crisa dalla vischnaunca, e che quel seigi sentupaus entochen oz otg gadas.

Tarcisi Dietrich engrazia per la preschientscha sut las cundiziuns spezialas e la partizipaziun. El giavischa alla cussegliera ed als cussegliers in bien retuorn a casa e siara la seduta dallas 21:50 uras.

Breil, ils 9 d'avrel 2020

Il vice-president

Tarcisi Dietrich

Igl actuar

Carlin Cadonau